

NWER NYI JEMS

1 Me Jems ji li nlokeltum Esowo, a no Ntul a Jisos Kraist, n kp'kake ewubu et'tohngo ebbal bi Israel nnyo, bi ma yaame.

Eltaame, a elkahne

2 Abonanee, jo bumen ana ejum eyebatahng, ngare anyehng anyehng nyi n l'jo yel go elgaare ni li nkohn a nkohn.

3 Tibre n kp'kahne re, elwuungu ni bo kpo wuungu eltaame enahne, ni ni kpo ko elkpuumu ba a ni.

4 Nongen, elkpuumu nio lim eltum ni nno go egahne atahng, eji n l'jol go nseenga nseenge, fere bel ejum ajehng ajehng eji ejum ajehng ajehng l'ki-n jo rin.*

5 Nne awohng awohng no elkahne l'rin-e, nong, á bahb Esowo, á bahke bele.† Tibre Esowo kpo wehr abo, ka ane kpee, jol á kpehme memme.

6 Nong, á bahb, jo bum Esowo go etingitingi, k'faabe.‡ Tibre nne no l'faabe, á li ana ebuku ji nfeb kp'yehke tv edi ajehng ajehng.

7 Nong, elkohn nne noo k'tir re, á bahke bele ejum goji Esowo.

8 Tibre á li nne no kil kahme ejum ajehng lim, á kp'dulu na dulu go ejum ajehng ajehng.

Ekpak, a afang

* **1:4 1:4** Rom 5:3-5; 1 Pit 1:6-7 † **1:5 1:5** Mat 7:7 ‡ **1:6 1:6** Mak 11:24

⁹ Nong, mmonannee no li nkpak geere, tib eji Esowo m-e mehl wahre.

¹⁰ Nong, efange nne tob geere, eji Esowo m-e rede. § Tibre á bahke kpoko ana afem ajele.*

¹¹ Njul kpo ya, fere jo ffub, fere fi ajele. Afem enye kum, ano enye mal. Mbang ny'nehm nyi efange nne bahke daade ngare nyi á kp'limi nsol enye.

Bade elgaare

¹² Elfuulu li a nne no kpo kpuumu elgaare. Tibre eji á ma yiimi go elgaare nio, á bahke bele ekpasi ntul ji elkpín,† ji Esowo ma nyam tong ane re bo bahke bele, ba ye kpi bo kor.

¹³ Elgaare l'ba a nne, nong, á k'jo tong re, "Esowo bi kp-m gare." Tibre nnene limm, no bahke ma gare Esowo re, Esowo lim ebi. Yefono antahng kpehme gare nne re, á lim ebi.‡

¹⁴ Nne awohng awohng kpo bel elgaare tib go nsol nyi kpo mell-e go eltim, nyi kpo wer-e, fere yehk-e tahm a ne.

¹⁵ Nsol nyio bahke sake ela, jel abiafem. Eji abiafem ma gbal mal, jen elkv. §

¹⁶ Akor-m abonanee, kana taame, bo nehm-n.

¹⁷ Ejum ajehng ajehng ji nno, a ayare nya nno a nno kpee kpo lohng go ero goji Esowo ba, ye ji limi ellennge. Á kpehme yaange. Jol ellennge ene kpehme gbo ejanng ajehng ajehng. Tibre Esowo kpehme yaange alum enye.*

§ 1:10 1:10 1 Kor 7:21-22 * 1:10 1:10 1 Pit 1:24 † 1:12 1:12

2 Tim 4:7-8 ‡ 1:13 1:13 1 Tim 2:4 § 1:15 1:15 1 Jon 2:16-17

* 1:17 1:17 1 Jon 1:5

18 Ana á toobo no wo, á jel-r no tib go alum nya li go etingitingi,† eji e l'jol agbokombang go ellong ane ebe ba li nfenfe.

Elwuku, a ellimi

19 Akor-m abonanee, nong, nne awohng awohng jo ware elwuku, á k'jo ware go elbungu,‡ á k'jo gulu atahng rak.

20 Tibre erakatahng kpehme lim nne re á li eno go esamahr bi Esowo.§

21 Owo fvfo, nobo re wahn yake nsol nyi ki li saang, a ab'bi nya ma tv na tv, wahn fere ko alum nya Esowo go eltim ni li reed, nya Esowo ma bahm go egahne atahng, nya bahke ma tahre atohko enyahne.

22 Jo limen ana alum Esowo bungu no, nya m ma wuk. Kana jol abaw'wuku ba ba, ba kpo nehm elbo.*

23 Tibre nne awohng awohng no l'wuk alum nyao, k'fere lim, á li ana nne no seenge go enyehn, nyehn elne.

24 Eji á ma nyehn elne, á kehm tahme eje, soro yini ana á li no.†

25 Nne no l'fahng go ntahm nyi li go nseenga nseenge,‡ nyi kpo lim nne, á for, á l'fere soro asi, jo lim ano, á l'jol nl'limi no kp'lohko lim, k'jol nne no kpo wuk, fere yini, á bahke bele elfuulu go nsol nyi á kp'limi.

† 1:18 1:18 Jon 1:13; 1 Pit 1:23 ‡ 1:19 1:19 Mat 12:36 § 1:20
 1:20 Ef 4:26 * 1:22 1:22 Mat 7:21 † 1:24 1:24 Rom 3:10 ‡ 1:25
 1:25 Jon 13:34

²⁶ Nne awohng awohng no l'tir re, ye kp'kake Esowo, k'jo baade nnyo eme,§ á kpi elne nehm na. Elkake ni á kp'kake Esowo li mbol mbol.

²⁷ A wo li mband ni Esowo akake nyi li saang, nyi elem ajehng ajehng ki li go esamahr Esowo Nso ejahre. Nne bahke jo kpur abon nkubin, a akalebun ba kp'nyehne erem, fere jo bum elne saang, eji á l'k'bel edehbe abiafem ajehng ajehng ji njini.

2

Erehke ji li bade ane arange

¹ Abonanee, eji n ma taame tv Jisos Kraist Ntul ewahre no li Ntul no kpi ellub, kana jo rang ane.

² Nne l'fere kak ebi agul, fere liibi anoobo nsol, ba yel go egahne ekp'kpa ero, nkpak nyi kake ajakensol tob ba yel,

³ n l'fere gbaame nne no liibi anoobo nsol, fere tong-e re, "Ba ji a," fere tong nkpak re, "Yiimi o!" tohko jol ano n tong-e re, "Ji go elka ndi kohlo eti ejame,"

⁴ n l'lim ano, n ka rang na ane oa?* N ka jol na ane ba kp'lame ane a ebi ntir atahnga?

⁵ Wuungen atung, akor-m abonanee, Esowo ebyehke ane ba li akpak go njini nyia re bo gbo afang nya li eltaame ni bo ma taame tv-e, fere li etul ebe ana ejum elehke elkv ebo, ji á nyame tong ane re bo bahke bele, ba ye kpi bo kor.†

§ 1:26 1:26 Kol 4:6 * 2:4 2:4 Elt 10:34-35 † 2:5 2:5 Luk 12:21; 1 Kor 1:26-29

⁶ Wahn ebdaange nkpak. Anv, afang ane sang kpo fil-n nyaame nyaama, fere jo tohng-n tahm a nahne go esuba?

⁷ Anv, bo sang li ane ba kpo bung ab'bi bada nnooba mbing nyi Esowo ma-n kaa?

⁸ Etingitingi, á l'bum ntahm nyi Ntul ana nwer Esowo bungu no re, "Nne ebjing ewa jo kor-a ana ebjing eba," no á kp'limi nob nob.‡

⁹ Wo, á l'jo rang ane, wahn eblim abiafem. Atahm bahke tibi re, wahn abagbokatahm ba.

¹⁰ Nne awohng awohng no l'bum atahm kpee, fere soodo anyehng, yebgbo atahm kpee.

¹¹ Tibre nonehm o no bungu re, "Ka lim erehbe!" ye j'nehm wo tob bungu re, "Ka wul nne!" A tohko lim erehbe, a l'fere wul nne, wobjol ngbokatahm.

¹² Jo bungen, wahn fere jo lim eljini ni ane ba Esowo bahke lame bo ana ntahm bungu no nyi kpo lim ane for.

¹³ Tibre ngare nyi Esowo bahke lame ane, nne no ane ki-e jo fili ndon, á nehm fili Esowo ndon. Fvfo, ndon nyi kpo wahng elam kane.§

Ana nne bahke jo tib eltaame ene

¹⁴ Abonanee, nsehng anyi nne bahke lehke, á l'tong re á kp'taame tv Esowo, k'tib eljini ni eltaame? Anv, elkohn eltaame ana nio bahk-e ma tahra?*

¹⁵ L'jol re mmonanne kpimm nsol ebjing, a nyi ellehke,

‡ 2:8 2:8 Mat 7:12 § 2:13 2:13 Mat 5:7; 18:32-34 * 2:14 2:14 Mat 7:26

¹⁶ nne awohng ewahne kehm-e tongo re, “Es-owo fuul-a, nong, alohk ki-a fili, wo jo li nsol nob nob”, k'fere ka-e nsol nyi m-e lehng, nsehng anyi li li o fono?†

¹⁷ Ano wo fvfo tob li ka nne no kp'taame, k'tib eljini ni eltaame. Eltaame ene, ekpakh eltaame ni.

¹⁸ Nne nondiki li ma bung re, “Ane bandiki kp'taame go nnyo, ane bako kp'limi eljini ni eltaame.”

Elkohn nne noo m bahk-e faange re, “A bahk-m ma tib eltaame ena renan, eji a kil jo lim eljini ni eltaame? M bahk-a tibi eljini ename, a kahn eltaame ename.”‡

¹⁹ A kp'taame re, li Esowo na abehng. Ano n'nob. Jol abi atohko fvfo kp'tob taame ano, fere jo k'kahm.§

²⁰ Egboolo nne, anv, a kp'sebe re me n tib-a re, nne no kp'taame, k'bel eljini ni eltaame, eltaame ene, ekpakh eltaame nia?

²¹ Ebrahim nso ejahre li eno go esamahr bi Esowo tib go ejum ji á limi no, eji á rodo Aisik mmon ewe, song lim njom.*

²² A nehme nyehn re, eljini ene jo jene ano a eltaame enea? Eljini ni nne kpo lim, ni ni kpo lim eltaame ene re jol go nseenge.

²³ Owo wahngedi nwer Esowo jia kehm jolo go etingitingi, ji bungu re, “Ebrahim taame tv Esowo. Eltaame ene ni wahngedi Esowo fang-e kak go ellong ane ba ma li eno go ege esamahr.” Bo fere jo lung-e re ntem no Esowo.

† **2:16 2:16** 1 Jon 3:17-18 ‡ **2:18 2:18** Gal 5:6 § **2:19 2:19** Mak 3:11; 5:7 * **2:21 2:21** Hib 11:17-19

²⁴ N kp'nyehne re, nne, Esowo kpo ka-e eno tib go nsol nyi á kp'limi, eltaame ni ni sang.

²⁵ Tob jolo ano jang jang a Rehab ji jolo nnenkal as'sa. Á li eno go esamahr bi Esowo tib go ejum ji á limi no, eji á vvrv aneb Jus ba bo tumu bo, á kake bo ebo, bo sehng mbang nyindiki, be ebo tahm.†

²⁶ Ana ngubjing nyi ki kpi etohko li ekpaky, ano wo tob li bada nne no kp'taame, k'tib eljini ni eltaame. Eltaame ene, ekpaky eltaame ni.

3

Bade ebliki

¹ Abonanee, nong, wahn k'jo ra eltibi. Tibre á kp'kahne re, wahr at'tibi, wahr ba, elam bahke ga bib a nahre.*

² Tibre wahr ane kpee e kpo kono elsoodo ngare anyehng anyehng. Nne awohng awohng no tohko jo soodo go ege alum nnyo, á li go nseenga nseenge. Á bahke ma tob jo fili ngubjing enye kpe kpe.

³ E l'kak mmokuungu go nnyo eny'nya, eji á l'wuk-r, e bahke ma jo soongo eny'nya kohro kohro.

⁴ Tob nyehnen asohkkahng fvfo, ana kp'gbale. Egburu nfeb kpo yehke bo. Mmons'sohko ejum ana nso nyi bo kpo ko soongo. Edi ajehng ajehng ji n'fingi l'soongo tv, owo nsohkkahng bahke jeke.

⁵ Ano wo fvfo ebliki li no. Li mmons'sohko ejum. Li ma wor nnyo bade aj'jok nsol, jang jang

† 2:25 2:25 Hib 11:31 * 3:1 3:1 Luk 12:48; Mat 12:36-37

ana mmotoongo agun bahke ma wahng egburu emahng lul.

⁶ Ebliki li ana agun. Tob li ana njini nyi ma gbal ab'bi ab'bi. Ebliki bi li ejum ngubjing ji kpo lim ngubjing kpe kpe sab.[†] Ebliki bi kpo jahm elkpin nne, kehm jo lul go agun nya nnehm m-e kak.

⁷ Elkohn nnyam anyehng anyehng ana nruk, enyo, a nsahre, ane kpo mal bob bo, ba le bo go etahk. Bo kpo lohko lim ano.

⁸ Nnene limm, no ma m'mal bob ebliki ebe. Ebliki li ab'bi ab'bi, bi nnene l'k'ma fili. Ebliki ebrur afa afa nyao nya elkv.

⁹ Ebliki bi e kpo ko tehk Jehova Nso ejahre, fere jo ko su ane ba Esowo limi go ege elfoongo.

¹⁰ Nnyo m'nehm mi kpo ka elfuulu, m'nehm mi kpo su nne. Abonanee, nong k'jo jol ano!

¹¹ Anv, esi ebgba bia, bi anoobo alahb kpo lohng semme a ma kp'lula?

¹² Abonanee, anv, mmehrekv bahke ma kab akab amangura, afi ejv bahke ma kab akab amehrekv?[‡] Ano wo fvfo alahb ma nno l'k'ma lohng go edi ji alahb ma kp'laabe kp'lohngo.

Nne awo li ekahnkahn nne?

¹³ Nne awo li ekahnkahn nne ji kp'bange go egahne ellong? Nong, á tib elkahne ene go ege a nnoobo elkpin, fere jo lim nnoobo go eltim ni li reed.

¹⁴ N̄ l'jol maange maange, ala fere jo teel-n, n̄ fere jo tiiri elnahne elnahne, kana jo wor nnyo re, n̄ kpi elkahne.§ Kana jo kiimi afahnge lake etingitingi.

[†] 3:6 3:6 Mat 15:11,18-19 [‡] 3:12 3:12 Mat 7:16-20 § 3:14 3:14 Ef 4:31

¹⁵ Elkohn elkahne ana nia lohngem go ero ba, li ni njini, a ni ngubjing, a ni nnehm.

¹⁶ Tibre edi ji ane kpi eteelala, fere jo tiiri elbo, ji ji kpo jol jokko jokko jokko, elkohn eb'bi ajehng ajehng wob ona.

¹⁷ Elkahne ni lohng go ero ni a. Ngbokambang, li saang, kpi elkoono seb, li soom, esi kpehme tahne, kpi ndon gbalee, a akab nya nno, nfaabe anyehng anyehng limm, awini limm.

¹⁸ Nkab eti nyio nyi ellimi go etingitingi, bob-bahm go ntim ane ba kpo lim ane koono.*

4

Etem alimi a njini

¹ Ejum aji wahnge nta kpo gbo? Ejum aji wahnge ntaange kpo gbo go egahne ellong? Kpo lohng go nsol nyi kpo sahb mell-n melle go egahne ntim, fere jo nok go egahne atahng.*

² N kpo sahb s'seb nsol, wo, n kpehme bel. Owo wahnge n kpo wul ane. N kpo baare amahr go nsol ane, n kpehme bel. Owo wahnge n kpo nok abohng, fere nok nta. N kpehme bel, tibre n kpehme bahb.

³ N kpo bahb, n kpehme bel, tibre n kpo bahb go ebi mbang. N kpo bahb nsol re wahn ko, jo lim ji kor-n no go egahna ntim.

⁴ Wahn abalimerehbe baa, n nehme kahn re, n l'lim etem a njini, wahn anebekv ba Esowo baa? Fvfo, nne no l'seb re á jol ntem no njini, yebrod elne bum ana nnekv no Esowo.†

* **3:18 3:18** Mat 5:9 * **4:1 4:1** 1 Pit 2:11 † **4:4 4:4** 1 Jon 2:15

⁵ Kana tir re, edi nwer Esowo jia li mbol mbol, ji Esowo bungu re, “Etohko ji Esowo ji wob go egahre atahng, e kp-e sahb t'teele ala.”‡

⁶ Esowo kp'kake nnoobo gbalee budu. Owo wahnge á bungu re,
“N kpo ten aneb elgeere,
fere rod nnoobo enyame ka ane ba ma rede elbo.”§

⁷ Owo fvfo nobo re, wahn rede elnahne, woomo Esowo go elwo. Jo tenen nnehm, á bahke beke tahm.*

⁸ Jeeren bade Esowo, Esowo bahke tob jeere bada nahne.† Ruun abo enyahne, wahn aneb abiafem! Ruun ntim enyahne, wahn ane ba kp'toono mbang ebal ebal!‡

⁹ Jolen ndon ndon, wahn jo guunu, fere jo ling. Nong, asol enyahne fere siingi elguunu, eyebatahng ejahne fere kpiidi, jo lub-n tamm go egahna ntim.§

¹⁰ Jo reden elnahne go esamahr Jehova, á bahk-n mehle wahre.

Kana jo lam atemtem

¹¹ Abonanee, kana jo bung eb'bi bade atemtem. Nne no l'bung eb'bi bada mmonannyehn,* tohko jol ano, á l'lam mmonannyehn,† yebbung eb'bi bade atahm, fere lam atahm. A l'lam atahm, a kpeem li nne no kpo bum atahm, wobjol nne no kp'lame atahm.

¹² Esowo bi li njehkatahm, a nl'lame,‡ ye ji kpo

‡ 4:5 4:5 Mat 6:24 § 4:6 4:6 Mat 23:12 * 4:7 4:7 1 Pit 5:8-9

† 4:8 4:8 Mat 7:8 ‡ 4:8 4:8 1 Jon 1:9 § 4:9 4:9 Luk 6:21 * 4:11 4:11 Mat 5:22 † 4:11 4:11 Rom 2:1 ‡ 4:12 4:12 Rom 14:4

mal eltare, fere r'ranng. Anv, wo elkohn nne awo no bahke lame nte ewa?

Erehke ji li bada nnyo aworo

¹³ Wuung-m wahn atung, wahn jia ji kpo kono elbunu re, "Lela, tohko jol ano behna, e bahke jeke ejahbe ajehng, owo e bahke lene go elya anehng, jo jen are fere jo lim akpohko."

¹⁴ Jol n nehme kahn ji bahke jolo behna. Anv, elkpín enahne li renan? Li ana ej'johk ji nne bahke ma nyehn mmongare ntiil, fere lamme.Š

¹⁵ Ji kehn n jol buni, li re, "Jehova l'taame, e bahke jolo go elkpín, fere jo lim ajoobo nsol."*

¹⁶ Anv, n kp'woro na nnyo, fere jo geere. Elkohn nnyo aworo mio kpee, ab'bi nya.

¹⁷ Nne awohng awohng no l'kahn ji nobo re á lim, k'fere lim, yebli abiafem.†

5

Erehke ji li ka afang ane

¹ N yahke bung a nahne anv, wahn afang ane. Jo lingen, wahn fere jo biingi go egburu erem bi n bahke nyehne.*

² Afang enyahne ebbol. Nsol ebjing enyahne, etan ebwo.†

³ Agul enyahne, a asilva enyahne ebbiili amahn. Amahn abiili nyaa nya bahk-n fvrv yake, fere fi agubjing enyahne ana agun. Tibre wahn ebkpú nsol afang luk es'kohro ngare nya.

Š 4:14 4:14 Luk 12:20 * 4:15 4:15 Elt 18:21 † 4:17 4:17 Luk 12:47; Jems 2:15-16 * 5:1 5:1 Luk 6:24 † 5:2 5:2 Mat 6:19

⁴ Akpohko nya á ki ka ane ba limi eltum go egahne ebgbe kp'rabe. Elrabe ni aneb eltum ebahne jo rabe, Esowo bi li nfono babenjel ebwuk.

⁵ Eji á jolo go njini, á jo li ebno, fere jo toono elyebe ni njini. Wahn eble elnahne, fere jok, ta afom ana nfong nyi ane kpo le, jo sik efung bi bo bahk-e wulu.‡

⁶ Wahn ba lame etingi nne, kim ebi ka-e, fere wul-e. Á kpo yake elne ka-n.§

Elkpooro, a ero akake

⁷ Abonanee, owo fvfo nobo re, wahn kpooro tete Ntul a Jisos ba. Nyehnen ana mbahmgbe kpo kpooro, jo sik anoobo nsol nya á bahke kpake go ege egbe.* Nya nya wahnge á kpo kpooro sik ngbokambang elahb tete elahb kimi, á song kpa.

⁸ Wahn fvfo, tob kpooren! Belen ntim nyi kp'tahne. Tibre elbake ni Ntul a Jisos ebkabbe.

⁹ Abonanee, kana jo memme tob atemtem, eji Esowo l'ki-n lam. Nyehnen, nl'lame ga, yim no go mbutahk.†

¹⁰ Abonanee, leemen eljini ni abanyehnamahr, ni bo jo kpuumu erem, bo jio ji jo bung go mbing nyi Jehova.

¹¹ Ane ba jo kpuumu, e kpo lung bo re, aneb eyebatahng.‡ Wahn ebwuk bade elkpuumu ni Job, fere nyehn ji Jehova limi no ka-e go es'kohro. Tibre Esowo, ane kpo fil-e ndon, á fere jo kak bo ebo.

‡ 5:5 5:5 Luk 12:20-21; 16:19-25 § 5:6 5:6 Jon 18:4-11; Hib 10:34

* 5:7 5:7 Hib 10:36 † 5:9 5:9 Ell 3:20 ‡ 5:11 5:11 Mat 5:12

¹² Abonanee, ji ga li, li re, wahn k'jo tir ejah-betul Esowo, afi jolo njini, afi fere jolo ejum jindikandiki gona. Nong, eltaame enahne ni á kp'taame jo jol re, "Ee", tohko jol ano wahn ten re, "E'ee", eji á l'k'li ebi go esamahr bi Esowo. §

¹³ Anv, nne awohng awohng ewahne noa, no kp'nyehne erema? Nong, á kak ero. Nne noa, no atahng kp-e yeba? Nong, á yim ase, tehk Esowo.

¹⁴ Anv, nne awohng awohng ewahne noa, no kp'yama? Nong, á lung anebkul ero, bo ba kak ero ka-e, fere taam-e akehng go mbing nyi Ntul a Jisos.

¹⁵ Ero eltaame bio bahke tahre nne eyam noo. Jehova bahk-e tabe jehke. L'jol nyi á limi abiafem, Esowo bahke tahme ka-e.

¹⁶ Fvfo, nobo re wahn jo fvrvv abiafem enyahne tong atemtem, fere jo kak ero ka atemtem, eji á l'jo nob go egahne ayam. Ero bi etingi nne Esowo kpo kak kpi egburu nsahm, Esowo kpo f'faange.

¹⁷ Elaija jolo nne ana wahr. Á kake ero eltim eltim ene re elahb k'na. Elahb tikem na go ndi nyio nnya era kunu nnyahng erakera.*

¹⁸ Á kehm kpe kak ero, Esowo kehm nake elahb. Ndi kehm kpe lim nsol lak.

¹⁹ Abonanee, nne awohng awohng ewahne no l'tan mbang nyi etingitingi,† nne noko fere ko-e, feere a ne,

²⁰ nong, á kahn re, nne no l'yehke nne abiafem go mbang nyi á kp'tane asongo, feere a ne, á

§ 5:12 5:12 Mat 5:34-37 * 5:17 5:17 Luk 4:25 † 5:19 5:19 Gal 6:1

bahke tahre etohko eje yehke go elkv, fere lim
Esowo bulu abiafem tvv.‡

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4